



河南府志卷之八十四

藝文志八

記二

嵩嶽中天王廟碑記

宋 盧多遜

廣雅稱山大而高者嵩也詩人謂峻極於天者嶽也名義昭

著布在文籍齊德泰華而獨峙於中方俯視河洛而助成其

秀氣惟神是宅炳靈孔昭以太史璇璣察乾文知其協星辰

之定域以陽城土圭測日景知其居天地之正中萬山四顧

而來向峭壁高聳而直立太室少室左右之勢通朝陽夕陽

東西之分正神仙秘洞府則浮邱子晉隱別館於巖壑帝王

405.176352

會衆神則秦皇漢武著古跡於壇廟眇觀歷代厥有祭法播
在典故垂諸禮文四簋六甄崇其儀制一禱三祀著爲彛章
我應天廣運聖文神武明道至德仁孝皇帝平一六合澄清
四海精誠貫於白日德教加於百姓凝旒顧問侍臣預對謂
天設神府陰主人事者何也曰嶽神也地邇王畿位正中土
者何也曰嵩高也嵩高何神也曰中天王也中天之封何代
也曰唐元宗天寶五載也帝曰吁我其念哉嘗聞天垂元鑒
神助陰陽合道則祐之反是則禍之神以我爲有道之君故
祈禱應神以我爲求理之代故風雨調神以我爲愛民之心
故稼穡豐穰神以我爲惠物之志故煙塵掃盪我今虔意思

有報者夫祀事恒典也何以加焉封爵舊制也無以增焉將
欲隆萬人之瞻仰莫若嚴績塑必欲垂永世之崇重莫若闡
廟貌乃命畫輪奐之美先列於畫圖又命擇貞幹之臣就護
其力役厥功告畢有司上言復命勒銘貞珉以盡紀錄盛矣
哉聖人之德冠古無倫以乾覆坤載爲楷模申之以周物以
堯步舜驟爲軌躅益之以緩轡猶能不以運祚自大而讓德
於元功不以治平自高而推謝於神貺不以豐登開拓驕其
志每志務乎允恭不以祠祀齋莊邀其福欲福臻於黎庶修
建旣備瞻奉有所牲牢蠲絜饗俎羅列使四望之禮煥赫於
典章綿彼歲月垂諸碑碣俾百王之道庶偕於法則夫如是

則每言執大珪登泰壇柴燎一舉而天神下降者信矣則知
嶽神奉上衷以安物因我皇而昭應惟仁是助潛契寬恕之
德惟明是贊默協和平之道是故言必從祈必應泰吾國安
吾民耆耄樵然哉盡人神交感之若是也上古稱以待風雨
易之以宮室後世謂既勤樸斲惟其塗丹雘本以純素漸崇
莊麗以至左平右域著爲體容範金合玉窮其華飾先王或
留心祠禱崇奉虛誕望仙作宮遂極土木之費夢虵立時大
設廟堂之響雖紀在方冊而無所取法今之建嶽廟奉嶽神
大增其華而不在奢侈曲盡其美而曾無勞役嚴殿宇崇門
直雕梁彩棟連甍接無庭軒洞邃瞻之肅然有以見我皇稽

古守正爲民崇祀之心形容於斯廟也不假探策知神有延
洪之貺不俟磨崖知我有永久之法然而冠古立制敷祐垂
德不有謨錄其何宣著微臣職備禁署目覩盛事奉命敘述
文不逮意豈獨使四海一統漢臣傳華嶽之碑百堵九成周
史頌終南之廟敢用實錄而爲銘云惟天保民在乎歲功惟
聖治民暢乎時風奉天助聖兮感而遂通昭昭嶽神兮鎮於
寰中備物有秩兮祀事是崇所以古禮之垂文兮五嶽視三
公惟民戴君尊乎寶位惟神祐君伸乎大義愛民奉神兮潔
誠以祭皇皇聖王兮重彼明祀昭以靈貺兮顯乎嘉瑞所以
漢帝之告功兮嵩山呼萬歲視三公兮表崇重於薦神呼萬

歲兮告延洪於聖人天地之中兮嵩高磷磷寰海一統兮景
福無垠我之聖德兮超彼前聞我之祈福兮在於生民豈比
夫獻壽之聲兮標漢史而徒云嵩書

勅祭漢光武記

開寶六年

宋蘇德祥

祭法曰能禦大災能捍大患方得在祀典祭義曰宮室既修
牆屋既設所以交神明惟後漢起南陽靜諸夏康濟於一時
惟大宋舉墜典秩無文輝映於千古是知祠祀大功其來尚
矣沿革盛禮可得言焉昔者漢運中缺新室不道九縣颺起
三精霧塞劉聖公以繡紉之衣憑陵冠蓋劉盆子擁赤眉之
衆竊弄干戈踰州連郡蜂飛蠅起光武帝攘臂一呼羣心四

附決昆陽之戰克乎百萬之敵拔邯鄲之壘遂應四七之符
築鄴邑之壇於以援天命定洛陽之都於以順人心若乃起
於民間始無尺寸之士垂乎帝位終爲夷夏之君復能日慎
一日安不忘危或親攬機權日昃乃罷或躬閱經史夜分乃
寐保全功臣而奉朝請進用文吏而責時務易凶歲爲豐年
變亂代爲治世開國二百載傳位十二帝則前之言禦大災
捍大患光武之道諒無愧焉我仁孝皇帝端居九五之位交
泰億兆之民德威四方擒僭僞之君者二歲周一紀薦郊祀
之禮者三而猶避興化之鴻名讓成功之懿號若朽索之御
六馬不捨戒懷理大國如烹小鮮自然均化制前古兼行之

禮旌歷代有道之君於是下明詔命有司陵寢除荆棘之穢
廟貌極籩豆之潔則前之言修宮室設牆屋我皇之旨侯其
偉與美哉新廟旣已成能事亦已畢爰覃睿旨俾書豐碑臣
猥以虛辱進叅撰述敢揚茂實云

宋文鑑

崇聖帝碑記

宋王曾

皇上登封岱宗之四年有事於汾陰后土親奠黃玉對越柔
祇乃並洪河抵太華經塗溫洛望秩維嵩宮旋上都誕受丕
祉無德不報靡闕不思於是尊五嶽之祠備加等之禮分命
近列祇薦徽稱詔遣冊禮使攝太尉右諫議大夫龍圖閣直
學士陳彭年副使攝司徒光祿少卿沈繼宗奉玉書袞章加

上中嶽中天崇聖王曰中天崇聖帝申殊典也粵若剛柔旣
位形器肇分上則圓蓋左旋星辰爲之紀下則黃圖俯察山
嶽奠其方卑高之序以陳翕闢之精攸託是故昭彰景緯實
參化育之權錯峙崇巒式表神明之壤用能安綏厚載磅礴
無垠宣一氣以施生降列真而主治事光虞典備五載之時
巡績著夏王正九州之封畧惟中崧之絕巘直關塞之奧區
京邑在其旁經瀆流其域萬邦輻輳霜露之所均二室天開
風雲之所蓄仙館宜宅靖其下壘漿潑溢湛其間頽木記其
幽徑紫芝擢乎靈藪喈呀萬壑始終乎鶉火之墟巘巘羣峰
包舉乎坤元之紐龍轡月童之陟降浮邱子晉之遊遨晝夜

逶迤千霄挺拔寓彼至剛之質洪惟不測之神至于輔德降
祥祝融由其興夏生賢命世申伯以之藩周需膏潤於原田
殖寶藏於邦國博大崇高而可仰聰明正直以無私茲所以
盛尸祝之儀首賡沈之法歲時祈報垂往載以不刊牲幣吉
蠲走殊方而胥暨者也遐觀秘紀博考靈蹤自書契之云興
卽等威之斯辨異軒冕服章之數爲山林川澤之宗旣秩視
於三公亦禮均於四望漢孝武之代爰啟戶封唐天冊之年
聿遵時邁洪猷益茂昭薦惟寅逮乎王樞重熙坤珍薦委乃
特疏於王爵用溥洽於神休雖事煥彌文而名非極摯汙隆
王運肖長從時若乃鉅宋之有天下也敷黃載以開階建朱

旗而統歷掃僭偽荒虐之跡追皇王揖讓之風烈祖以功格
上旻威赫靈於九服神宗以德綏羣品薄文軫於四遐翼子
詒孫重規疊矩卜年有永奕世其昌崇文廣武感天尊道應
真祐德上聖欽明仁孝皇帝躬濬哲之姿撫鴻明之運出乎
震而齊乎巽就如日而望如雲宣九德以在躬定一戎而纂
業慎恤刑典鄙凝脂之煩苛寅布政經同馭朽之兢畏絕濫
巾於邱壑寬盍徹於農桑宮罔飾於采椽澤必周於行葦萬
民以察庶績伊凝破觚爲圜返羣情於太素懷遠以德篤交
聘於殊鄰按曆以朝諸陵志敦不匱被袞而郊上帝神享克
誠故得時協混同歲臻豐稔高穹委鑒真馭戒期薦錫寶符

丕昭元歷登岱舉封崇之禮臨汾展合答之祠刻翠崖之鬱
蒼踐隆雝之崛岉升煙瘞玉明察之義交修垂象資生應見
之祥繼至遂成先志對越純休洎乎五玉會朝六飛旋軫寅
緣二陝曠望三川旣並走於祠官亦周爰於土訓瞻言翠嶠
增肅皇情方飲至以策勲益爲民而儲祉順時行慶大賚及
於幽遐恭已嚮明寂慮周乎冲漠爰稽往誥肇易鴻名亟下
詔於司存俾講儀於置絕用伸昭報罄達清衷以爲在天者
五精旣隆稱謂麗地者列鎮當極推崇燾載之義則均欽助
之功曷爽登於帝錄允契靈心先是東巡之年己加崇聖之
號逮茲間歲愈洽徽章於時孟冬戒辰輜軒飭駕儼法坐闕

端闈臨遣以示乎必躬信辭以申乎有恪公卿就列使介奉
塗擁翠蚪之車載溫珉之冊山龍盛服羽衛多儀備物孔昭
歸尊斯在戊申發軔於京闕辛酉致饗於廟庭四牡趨風六
樽登薦其始至也凝露布濩色晦平林其將升也霽景晏溫
光含邃宇嘉氣吐蜿蜒之狀霽雲呈綵綵之姿及清醮之肅
陳復素霓之紛灑煥珠禎於史牘浹餘潤於農疇昔者三境
登晨乃靈氛之協兆五車受職亦時雪之先期千古同符萬
邦攸仰矧復鋪皇睿訓紬繹微言發於垂象之文顯述奉神
之旨頒於著位告厥多方同星日之耀芒冠典墳而擅美啟
矇昏之耳目示制作之楷模遂令率土承流盈庭獻議大刊

翠琰徧揭嚴祠衆欲上通俞音誕布琢佗山而列跽攄縹藻
以相輝文籍以還莫斯爲盛而又壺闈之式像設攸存懿號
未彰羣黎安仰思舉正名之典用昭作合之崇象服有加禱
衣允穆卽以其年十二月遣使致告特尊爲貞明后莫不義
敦咸秩曲盡於精虔慶洽惟新永光於儀矩且夫昊蒼有成
命我實受之神祇有常奉我實主之禮文之廢墮惟聖人修
之典冊之徽敷惟哲后行之然則出雲播氣福善庇民啟紛
沓之殊徵保延洪之景祚鎮靜坤軸控壓都畿純佑之功斯
爲至矣懷柔之道庸可闕乎得不罄昭事之儀懋寅畏之志
翠旒玉藻飭如在之眸容駢犢明粢展惟馨之潔祭采物於

焉而大備格思由是而可期赫偉觀於八紘奮景炎於億載
事存因革禮浹幽明煌煌焉秩秩焉真竹素之英蕤而帝皇
之盛則者矣是宜發揚懿鑠篆刻豐碑俾民聽之弗迷協山
聲而共永允資麗藻煥彼殊庭而臣猥以瑣才濫膺明詔屬
辭比事雖慕於陽秋相質披文懼遺於德美旁稽舊典以爲
斯銘其辭曰沈潛定位塊圪殊形或融或結爲記爲經奠方
作鎮含澤儲靈生物不匱得一以寧節彼崧高峙茲中土帝
宅開疆仙臺胥宇霜露所均梯航攸聚四國是維千畿式序
奚其主治邈矣清真宣功博載授職高旻財成庶類陰騭齊
民列辟嚴奉牲粢有倫乃視公爵隆周集慶乃啟王封皇唐

累盛奉若貞期對揚景命將極推崇聿求元聖炎精撫運蒼
震承基天臨赤縣風偃遐圻祀事肅增祠官允釐勤恁大寶
交修上儀謁欵隆睢經塗太室期慕仙館襄回雲蹕何以致
誠於焉望秩明詔誕敷微言有述溫珉載刻羽衛斯皇登於
帝籙飭以袞章信辭郁郁鸞車鏘鏘法坐臨遣縟禮具揚四
牡于征殊庭戾止潔志旁達靈心遄喜霰雪霏灑卿雲蔚起
碩德歆馨發祥錫祉昔在治古祇惕明威道苟中否神亦靡
依赫赫我后聿彰鴻徽祭則受福先而不違顯號克崇丕猷
允穆流詠琬珉飛英筴祝峻岳孟安高巖雲矗鞏固瑤圖永

綏坤軸

石刻

重修西京白馬寺記

宋 蘇易簡

東周舊壤西洛名都景氣澄清風物奇秀長源渺渺元龜負
書之川平隰依依白馬馱經之地考其山爲中國招提之始
語其要居西一作兩京繁會之間歷累朝而久鬱禱符偶昌運

而薦陳靈貺不有興葺寧紹德音法天崇道皇帝端拱北辰
垂裳南面步攝提而重張歲紀挹鈎陳而再紐乾綱實異俗
於藁街納生民於壽域尙或探元象外訪道環端恭己虛懷
法瀉汭無爲之化凝神靜想憶靈山授記之言肖鴻名崇十
號之空王卑皇居峻三休之妙觀坐致華胥之境平登安養
之方慈雲遠覆於冰天法浪遐滋於桂水東踰漲海揚帆頒